

Pikinini Bilong Man

J Glenn Calderwood
PNG BIBLE RESOURCES

Pikinini Bilong Man

Sande Baibel Toktok

Painim ol wanwan tok

	Baibel Ves	Het Toktok	Pes
1	Daniel 7:13-14 Aposel 7:54-56	Pikinini Bilong Man	2
2	Daniel 7:14 Mak	Jisas Em i Pikinini Bilong Man.	4
3	Aisaia 35:4-6. Mak	Ol mirakel bilong Pikinini Bilong Man.	6
4	Mak 2:1-12	Pikinini Bilong Man i gat namba bilong rausim na fogivim sin.	8
5	Mak 10:32-33 Mak 10:45	Pikinini Bilong Man i kam bilong mekim wanem?	10
6	Mak 12:28-31	Pikinini Bilong Man i kam bai yumi no ken i lus long God.	12
7	Mak 14:32-36 Mak 15:33-34	Pikinini Bilong Man Em i dai.	14
8	1 Korin 15:3-8 Aposel 17:30-31	Pikinini Bilong Man Em i kirap bek.	16
9	Mak 10:35-45	Pasin bilong bihainim Pikinini Bilong Man.	18
10	1 Timoti 3:1-7 Mak 10:42-44	Lida long sios bilong Pikinini Bilong Man.	20

Pikinini Bilong Man.

Planti taim insait long 4-pela buk bilong Baibel – Matyu, Mak, Luk, Jon – Jisas i yusim nem “Pikinini Bilong Man” bilong makim Em yet. Jisas wantaim ol sampela manmeri ol i yusim nem “Pikinini Bilong Man” 82-pela taim bilong makim Jisas. Na dispela nem “Pikinini Bilong Man” em i namba wan nem *Jisas yet* i yusim bilong makim Em yet.

Em olsem tasol yumi no save tumas na yumi no tingim tumas *as* bilong dispela nem. Nem “Pikinini Bilong Man” em i wanem samting na i gat wanem minim bilong em i stap?

Bilong kisim save long nem “Pikinini Bilong Man” yumi skelim ol sampela tok i stap long Olpela Testamen. Yumi skelim wanpela visin Daniel i bin lukim. Dispela em i fes taim nem “Pikinini Bilong Man” i kamap insait long Baibel.

Daniel i lukim visin na em i stori long ol samting em i lukim. Pastaim em i stori olsem, God Bilong Oltaim Oltaim Em i kam sindaun long sia king long heven na ol tausen tausen tausen manmeri ol i sanap na ol i lukluk i stap. Orait long **Daniel 7:13-14** Daniel i diskraibim (stori long) ol narapela samting em i lukim.

¹³ **Mi lukim dispela samting long visin long nait:**

**Mi lukim wanpela i kam, na i luk olsem em i olsem pikinini bilong man,
na em i kam wantaim ol klaut bilong heven.**

**Em i kam long God Bilong Oltaim Oltaim,
na ol i kisim em i kam stret long Em.**

¹⁴ **Na God Bilong Oltaim Oltaim i givim namba long Em bilong bosim olgeta samting, na i givim glori long Em, na i givim kingdom long Em,
bai olgeta manmeri bilong olgeta kantri na bilong olgeta tok ples bai i stap aninit long Em.
Na Em bai bosim olgeta samting oltaim oltaim; namba bilong em i no inap pinis,
na kingdom bilong Em i no inap lus. Daniel 7:13-14.**

Taim Daniel i tok, “*Mi lukim wanpela i kam, na i luk olsem em i olsem pikinini bilong man,*” orait em i minim olsem, em i lukim wanpela i kam na em i luk olsem em i *man olsem mipela i man*. Dispela man Daniel i lukim, i luk olsem em i wanpela man bilong dispela graun.

Tasol, long ai bilong ol tausen tausen tausen manmeri God i putim ples klia olsem, dispela pikinini bilong man, dispela man i stap olsem man bilong dispela graun, em i narapela kain man. Lukim **lain 14** na yumi skelim 3-pela samting God i putim ples klia bilong dispela “pikinini bilong man”.....

1. Em i gat wankain glori olsem God yet.
2. Em i gat namba olsem God bilong bosim olgeta samting bilong olgeta hap bilong dispela graun.
3. Kingdom bilong God em bilong Em. Em i king na oana na bos bilong kingdom bilong God.

Taim Jisas i yusim nem “Pikinini Bilong Man” bilong makim Em yet, orait i olsem Jisas i tok, “*Mi dispela man. Mi gat wankain glori olsem God yet. Mi gat namba olsem God bilong bosim olgeta samting bilong olgeta hap. Kingdom bilong God em bilong Mi. Mi king na oana na bos bilong kingdom bilong God.*”

Jisas Em i Pikinini Bilong Man. Jisas i stap long wanpela level wantaim God. Olgeta samting bilong God em bilong Jisas tu. Glori bilong God em i glori bilong Jisas. Namba bilong God em i namba bilong Jisas. Pawa bilong God em i pawa bilong Jisas. Kingdom bilong God em i kingdom bilong Jisas. Em olsem na, yumi ken i save olsem, Jisas Em i God olsem Papa Em i God na Holi Spirit Em i God.

Skelim tok bilong Stiven tu long **Aposel 7:54-56**.

⁵⁴ Ol i harim olgeta tok Stiven i autim na ol i bel hat nogut tru na ol i skrapim tit bilong ol. ⁵⁵ Tasol, Holi Spirit i pulap long Stiven, na em i lukluk strong long heven na em i lukim glori bilong God na em i lukim Jisas i sanap long han sut bilong God. ⁵⁶ Na Stiven i tok, "Lukim, mi lukim heven i op na Pikinini Bilong Man i sanap long han sut bilong God." Aposel 7:54-56.

Man i sanap long han sut bilong God Em i stap long wanpela level wantaim God. Stiven i lukim Jisas Em i Pikinini Bilong Man na i stap long wanpela level wantaim God. Em i lukim Jisas i stap God wantaim Papa God.

Yumi mas harim tok bilong Pikinini Bilong Man.

Jisas Em i Pikinini Bilong Man Daniel i bin lukim long visin bilong em. Em i gat wankain glori olsem God yet. Em i gat namba bilong bosim olgeta samting bilong olgeta hap bilong dispela graun. Kingdom bilong God em i bilong Em. Em i king na oana na bos bilong kingdom bilong God. **Long dispela as** yumi mas harim tok bilong Jisas long olgeta samting.

Na yumi mas harim tok bilong Jisas long olgeta samting bilong rausim na fogivim sin. Long wanem, manmeri i gat sin ol i no inap i go insait long kingdom bilong God. Tasol, sapos God i rausim na fogivim sin bilong ol, orait ol i ken i go insait long kingdom bilong God. Na Jisas Em i save long olgeta samting bilong kingdom bilong God. Olsem na Em i save long olgeta samting bilong rausim na fogivim sin.

Jisas i tok, "*Mi yet Mi rot, na Mi as bilong Tok i tru, na Mi as bilong laip. I no gat wanpela man inap i go long Papa long narapela rot. Nogat. Long Mi tasol.*" (**Jon 14:6**) Long dispela tok Jisas i rausim olgeta narapela rot. Tasol ol planti manmeri i tingim olsem, baptais em i rot, na pasin bilong lukautim Sabat o Sande em i rot, na pasin bilong stretim laip em i rot. Taim ol i makim kankain rot olsem, orait ol i givim baksait long Pikinini Bilong Man.

Yumi i pas long Jisas, yumi ken i sanap strong.

Yumi i pas long King bilong kingdom bilong God yumi ken i sanap strong na yumi ken i amamas. Long wanem, yumi pas long rait Man stret na long rait rot stret. Yumi pas long Man i gat namba i winim olgeta namba. Yumi pas long Pikinini Bilong Man.

Jisas Em i Pikinini Bilong Man.

Las wik long Sande Baibel Toktok yumi bin skelim namba wan nem Jisas i yusim bilong makim Em yet, na dispela nem em i “Pikinini Bilong Man.”

Long Olpela Testament, long buk Daniel, Daniel em i stori long wanpela visin em i bin lukim. Em i lukim God Bilong Oltaim Oltaim na Em i sindaun long sia king long heven na ol tausen tausen tausen manmeri ol i sanap na ol i lukluk i stap. Na Pikinini Bilong Man i kam long Em....

**Na God Bilong Oltaim Oltaim i givim namba long Em bilong bosim olgeta samting, na i givim glori long Em, na i givim kingdom long Em,
bai olgeta manmeri bilong olgeta kantri na bilong olgeta tok ples bai i stap aninit long Em.
Na Em bai bosim olgeta samting oltaim oltaim; namba bilong em i no inap pinis,
na kingdom bilong Em i no inap lus. (Daniel 7:14.)**

Taim Jisas i yusim nem “Pikinini Bilong Man” bilong makim Em yet, orait i olsem Jisas i tok, “Mi dispela man. Mi gat namba bilong bosim olgeta samting bilong olgeta hap. Kingdom bilong God em bilong Mi. Mi king na oana na bos bilong kingdom bilong God.”

Jisas i mekim trupela tok o nogat?

Na Jisas i tok tru o Em i tok nating tasol? Jisas i mekim trupela tok o Em i bikhet tasol na Em i toktok? Yu gat wanem tingting? Orait, yumi skelim ol evidens Mak i putim ples klia bilong yumi. Yumi skelim toktok bilong ol sampela ai witnis, em ol manmeri i lukim na ai witnisim wokabaut na sindaun bilong Jisas.

- Jisas i gat namba na pawa bilong autim tok. (Lukim **Mak 1:17 na Mak 1:21-21 na Mak 2:25-27 na Mak 3:20-30, 30-15 na Mak 4:1-34 na Mak 7:14.**)
- Jisas i gat namba na pawa bilong rausim ol kainkain sik. (Lukim **Mak 1:29-31 na Mak 1:40-42 na Mak 2:1-12 na Mak 3:1-6 na Mak 5:25-34 na Mak 6:53-56 na Mak 7:31-37 na Mak 8:22-26.**)
- Jisas i gat namba na pawa bilong bosim ol samting bilong dispela graun. (Lukim **Mak 4:35-41 na Mak 6:45-52.**)
- Jisas i gat namba na pawa bilong bosim kaikai. (Lukim **Mak 6:30-44 na Mak 8:10.**)
- Jisas i gat namba na pawa bilong bosim na kontrolim ol spirit nogut. (Lukim **Mak 1:21-28 na Mak 3:7-12 na Mak 5:1-13 na Mak 7:24-30.**)
- Jisas i gat namba na pawa bilong rausim na fogivim sin. (Lukim **Mak 2:1-12.**)
- Jisas i gat namba na pawa bilong bosim laip na dai. (Lukim **Mak 5:35-42.**)

Ol manmeri i lukim na ai witnisim Jisas ol i save olsem wanpela bikpela bikpela samting stret i kamap namel long ol. Olsem na...

“Ol manmeri bilong olgeta hap i kam long Jisas.” Mak 1:45.

“Ol i tok olsem, ‘Bipo, yumi no bin lukim dispela kain samting, nogat tru.” Mak 2:12.

“Na ol manmeri i gat sik ol i resis na ol i laik i go klostu long Jisas na tasim Em.” Mak 3:10.

“Dispela man em i husat tru na win na wara i save harim tok bilong Em.” Mak 4:41.

“Na olgeta manmeri i tanim het long ol dispela samting.” Mak 5:20.

“Na ol manmeri i lukim dispela samting na ol i kirap nogut tru.” Mak 5:42.

“Na ol sik manmeri i tokim Jisas olsem, ‘Plis, larim mipela i ken i tasim liklik hap bilong klos bilong Yu.’ Mak 6:56.

“Na planti manmeri i kirap nogut na tanim het long ol dispela samting.” Mak 7:37.

Yumi mas klia olsem, Jisas i wokim ol planti kainkain samting bai ol manmeri ol i ken i save olsem, Jisas Em i Pikinini Bilong Man bilong visin bilong Daniel. Yumi no ken i paul long *as* bilong ol mirakel bilong Jisas. Yumi mas klia olsem, Jisas i wokim ol mirakel bilong soim olgeta manmeri Em i Pikinini Bilong Man olsem Em i tok. Ol mirakel bilong Jisas em i *evidens* bilong soim olsem, Jisas Em i Pikinini Bilong Man Daniel i lukim long visin bilong em.

Na planti taim Jisas i bin tokim ol disaipel olsem,

“Pikinini Bilong Man i mas kisim kainkain hevi, na ol bikman na ol hetpris na ol tisa bilong lo ol bai givim baksait long Em, na ol bai kilim Em i dai na Em bai i kirap bek gen long 3-pela de.” Mak 8:31.

Na ol dispela samting i kamap olsem Jisas i tok. Long wanem? Jisas Em i Pikinini Bilong Man. Olgeta samting bilong God em bilong Jisas. Glori bilong God em i glori bilong Jisas. Namba bilong God em i namba bilong Jisas. Pawa bilong God em i pawa bilong Jisas. Kingdom bilong God em i kingdom bilong Jisas. Olgeta *ai witness* na olgeta *evidens* i sapotim na i putim ples klia olsem, Jisas Em i Pikinini Bilong Man.

Yumi no ken i givim baksait long *evidens* bilong *ai witness*.

Tingim. Sapos wanpela mejistret bilong kot i givim baksait long ol *ai witness* na long ol *evidens* na em i kamapim disisen bilong em nating, orait dispela i no gutpela na ol manmeri bai komplem. Na wankain olsem, i no gutpela long yumi i givim baksait long ol *ai witness* na long ol *evidens*. Sapos yu givim baksait long ol *ai witness* na long ol *evidens*, orait yu wokim wanpela bikpela mistek bilong laip bilong yu.

Em olsem na yumi mas skelim ol *ai witness* na ol *evidens* God i givim yumi, na yumi wokim disisen bilong yumi - Jisas i tok nating o tru tumas Jisas Em i Pikinini Bilong Man olsem Em i tok?

Sapos Jisas Em i Pikinini Bilong Man olsem Em i tok, orait yumi mas harim tok bilong Em tasol na bihainim Em tasol. Waitman bilong yu em i no Pikinini bilong Man. Misineri bilong yu em i no Pikinini Bilong Man. Misin bilong yu em i no Pikinini Bilong Man. Pasta bilong yu em i no Pikinini Bilong Man. Nogat. Jisas wanpela Em i Pikinini Bilong Man na yumi mas pas long Em tasol na yumi bilipim na trastim Em tasol na yumi bihainim tok bilong Em tasol.

Ol mirakel bilong Pikinini Bilong Man.

Long wanem as Jisas i wokim ol kainkain mirakel?

Sampela manmeri i tingim olsem, Jisas i wokim ol mirakel bilong soim yumi olsem, Jisas bai stretim sik bilong yumi. Ol i tingim olsem, "Taim Jisas i stap Em i stretim sik bilong ol manmeri, olsem na, Em i ken i stretim sik bilong yumi i bilip." Ol i tingim olsem, "Sapos yumi bilip strong, orait Jisas bai bekim bilip bilong yumi na stretim sik bilong yumi." Na sampela manmeri i skruim tingting na ol i tok olsem, "Yumi ken i givim baksait long haus sik na yumi prea tasol na Jisas bai rausim sik bilong yumi."

Na sori tumas, ol sampela manmeri i bihainim ol dispela kain tingting na ol i kamapim *bisnis (wok mani)* bilong ol long dispela samting. Ol i save raun long wanwan ples, na sapos yu baim ol long sampela mani, orait ol i ken i prea long yu bai Jisas i stretim sik bilong yu. Na ol planti manmeri bilong ples ol i baim ol. Long wanem, ol i bilip olsem, sapos yumi prea strong long Jisas, orait Em i ken i stretim sik bilong yumi. Ol i tingim olsem, Jisas i wokim ol mirakel bilong soim yumi Em bai wokim mirakel na stretim sik bilong yumi i bilip.

As bilong Jisas i wokim ol kainkain mirakel.

Bilong kisim save long *as* bilong ol mirakel bilong Jisas, orait yumi mas skelim sampela toktok bilong profet Aisaia. Na yumi holim tingting, tok bilong Aisaia em i *tok profet* toktok. God i givim na Aisaia i raitim dispela tok long 500 o 600 yia bipo Jisas i kamap long dispela graun. Em olsem na tok God i givim Aisaia i kamap longtaim pinis na *bihain* Jisas i kamap.

Na Aisaia i mekim wanem kain toktok? Aisaia i tokaut olsem, taim God i kam, ol manmeri ol i ken i lukim ol kainkain samting na ol i ken i save olsem, God i kam pinis. Na Aisaia i tokaut long wanem kain mak i ken i makim God na ol manmeri ol i ken i save olsem God i kamap namel long ol? Orait yumi lukim na skelim **Aisaia 35:4-6.**

⁴ Tokim ol man bel na tingting bilong ol i no strong olsem, "Yupela i mas sanap strong na i no ken pret. God bai i kam na kisim bek yupela na mekim save tru long ol birua bilong yupela." ⁵ Orait na ol aipas bai ol i lukluk, na ol iapas bai ol i harim toktok. ⁶ Na ol lek nogut bai ol i kalap olsem ol dia, na ol mauspas bai ol i singaut na amamas. Aisaia 35:4-6.

Aisaia i tok wanem? Em i tok, "Taim God i kam, orait bai yu lukim aipas man i lukluk, na iapas man i harim, na lek nogut man i kalap, na mauspas man i toktok."

Yu save, God i gat plen bilong Em i stap na Em i bihainim plen bilong Em na Em i kam. Em olsem na Em i no kam wantaim ol tausen tausen ensel na wantaim ol kainkain bilas na ol kainkain nois. Nogat. Em i kam long narapela kain rot.

Em olsem na, God i tokim Aisaia olsem, taim Mi kam, orait ol man bai lukim ol kainkain *sain* na ol i ken i save olsem, Mi kam. God i no inap kam ples hait. Nogat. God i tokim Aisaia long ol wanwan sain ol manmeri ol i ken i lukim na ol i ken i save olsem, God i kam na i stap namel long ol.

Orait, nau yumi skelim samting ol manmeri i lukim na witnisim long ai bilong ol yet.

Mak 1:29-34, 40-42. Jisas i stretim ol sik manmeri, na Em i rausim spirit nogut.

Mak 2:1-4, 11-12. Jisas i stretim lek bilong lek nogut man na em i kalap.

Mak 7:31-32, 34-35, 37. Jisas i stretim ia bilong iapas man na em i harim, na Jisas i stretim maus bilong mauspas man na em i toktok.

Mak 8:25. Jisas i stretim ai bilong aipas man na em i lukluk.

Yu save? Jisas i wokim ol mirakel bilong soim olsem, Em yet Em i God i kam olsem Aisaia i bin tok. Pikinini Bilong Man Em i God i kam daun long dispela graun na Em i wokim ol mirakel bilong soim olsem, Em yet Em i God i kam olsem Aisaia i bin tok 500 o 600 yia bipo.

Ol manmeri bilong Juda ol i save long ol toktok bilong profet Aisaia. Em olsem na ol mirakel Jisas i wokim em bilong *kirapim tingting* bilong ol long tok God i bin givim Aisaia. Ol mirakel Jisas i wokim ol i sain bilong *makim Jisas*, bai ol manmeri ol i ken i save olsem, Jisas Em i God na Em i kam pinis olsem God i tokim Aisaia.

Yumi no ken i paul long *as* bilong ol mirakel bilong Jisas. Jisas i wokim ol mirakel bilong soim olgeta manmeri Em i God na Em i kam olsem profet Aisaia i bin tok.

Yumi stretim tingting.

Taim yumi bilipim na trastim na bihainim Jisas, orait dispela i *no* minim olsem, Jisas bai stretim ol sik bilong yumi na yumi kisim ol gutpela gutpela sindaun. Nogat. Na tu, taim yumi bilipim na trastim na bihainim Jisas na yumi kisim sik, orait dispela i *no* minim olsem yumi sot long bilip. Nogat. Yumi no ken i larim toktok bilong ol sampela manmeri long ples i paulim yumi. Na yumi no ken i baim mani long manmeri i wok bisnis long prea long ol sik manmeri bai Jisas i stretim ol. Nogat. Yumi mas klia olsem, Jisas i wokim ol mirakel bilong soim yumi olsem, Jisas Em i God i kam olsem Aisaia i bin tok.

Jisas i kam bilong mekim wanem?

Pikinini Bilong Man bilong visin bilong Daniel Em i no kam bilong stretim ol sik bilong yumi. Nogat. Em i kam bilong lusim laip bilong Em bilong baim bek laip bilong ol planti manmeri. Laip bilong Jisas yet i olsem pe bilong *baim freedom* bilong ol planti manmeri bai ol i stap fri long pe bilong sin na dai. Pe bilong sin em i dai, na Jisas Em i dai bilong baimaut pe bilong sin bilong sinmanmeri, bai ol i stap fri long kalabus bilong i dai na ol i no ken i lus long God oltaim oltaim long kalabus hel.

Yumi ken i givim bikpela tok tenkyu long Jisas. Long wanem? Em i no kam bilong stretim ol sik bilong yumi. Nogat. Em i kam bilong lusim laip bilong Em bilong baim bek yumi long pe bilong sin na dai. Na dispela i gutpela i gutpela tumas!

Pikinini Bilong Man i gat namba bilong rausim na fogivim sin.

Sapos wanpela man i brukim haus bilong mi na em i stilim ol samting bilong mi, orait narapela man i ken i rausim na fogivim dispela rong bilong stilman o nogat? Narapela man i ken i go long stilman na tokim em olsem, "Mi rausim na fogivim dispela rong bilong yu," o nogat?

Harim. Mi wanpela tasol i ken i rausim na fogivim dispela rong bilong stilman. Long wanem, stilman i wokim rong long mi tasol, olsem na, mi wanpela tasol mi i ken i rausim na fogivim rong bilong stilman.

Na wankain olsem, God tasol Em i ken i rausim na fogivim sin bilong sin manmeri. Lukim **Mak 2:1-7**. Ol sampela tisa bilong lo ol i save long dispela samting na ol i tok, "*Ol man i no inap tekewe sin. Nogat. God tasol i ken i tekewe sin.*"

¹ Sampela de bihain Jisas i go bek gen long taun Kaperneam na ol manmeri i harim olsem Jisas i kam bek gen long haus. ² Olsem na, planti manmeri i kam bung na haus i pulap tru, na planti manmeri i pulap autsait long haus tu. Na Jisas i autim tok bilong God long ol. ³ Na ol sampela man i kam long haus na 4-pela bilong ol i karim wanpela man lek bilong em i dai pinis. ⁴ Tasol haus i pulap na ol i hat tru long kisim man i go klostu long Jisas. Olsem na, ol i go antap long rup bilong haus na ol i wokim hul long rup na ol i pasim rop long bet na lusim em i go daun long Jisas. ⁵ Na Jisas i lukim bilip bilong ol na Em i tokim dispela man lek bilong em i dai pinis olsem, "Pikinini, Mi tekewe sin bilong yu."

⁶⁻⁷ Tasol, sampela tisa bilong lo i stap long haus na ol i kisim tingting olsem, "Long wanem as dispela man i mekim tok olsem. Em i mekim tok bilas long God. Ol man i no inap tekewe sin. Nogat. God tasol Em inap tekewe sin." **Mak 2:1-7**.

Na olsem wanem God tasol i ken i rausim na fogivim sin (tekewe sin)? God tasol i ken i rausim na fogivim sin bikos taim yumi wokim sin, orait yumi wokim sin long God. Taim yumi wokim rong, orait yumi wokim rong long God. Long dispela as God tasol i ken i rausim na fogivim sin bilong yumi.

God i bin wokim yumi na Em i wokim olgeta samting bilong dispela graun. Em i Papa bilong yumi, na yumi mas lavim God na yumi mas harim na bihainim tok bilong God. Taim yumi givim baksait long Em na taim yumi sakim tok bilong Em na taim yumi lavim ol narapela samting bilong dispela graun na yumi no lavim God tasol, orait yumi wokim rong long God, na dispela rong Baibel i kolim *sin*.

Ol tisa bilong lo ol i skelim dispela samting stret na ol i tok, "*God tasol Em inap tekewe sin.*" Tasol, ol narapela samting ol i no skelim stret. Nogat. Ol i tingim olsem, Jisas Em i man nating tasol na Em i giaman. Em olsem na ol i tok, "*Em i mekim bilas long God.*" Sapos ol i skelim stret, orait ol inap save olsem, Jisas Em i God, na sapos Jisas i laik rausim na fogivim sin bilong wanpela man, orait Em i ken i rausim na fogivim sin bilong em.

Sin na hevi bilong sin, tupela i pas wantaim long tingting bilong Jisas.

Yumi mas klia olsem, olgeta kainkain sik bilong dispela graun em i kamap long rot bilong sin bilong Adam na Ivi. Taim tupela i givim baksait long God na tupela sanap long strong na save bilong tupela yet, orait God i putim olgeta samting bilong dispela graun insait long sik na dai. Em olsem na, olgeta kainkain sik na dai em i mak na hevi bilong sin. (Yu ken i lukim na skelim **Jenesis sapta 1-3.**)

Em olsem na, taim Jisas i stretim lek bilong lek nogut man, orait em i rausim hevi bilong sin long bodi bilong em. Long tingting bilong Jisas sin na hevi bilong sin tupela i pas wantaim. Em olsem na taim Jisas i rausim hevi bilong sin bilong lek nogut man, orait dispela i soim olsem, Jisas i gat strong bilong rausim na fogivim sin. Jisas i gat namba bilong rausim *hevi* bilong sin na Em i gat namba bilong rausim na fogivim *sin*. Rausim hevi bilong sin na rausim sin em i wankain samting long Jisas. Lukim **Mak 2:8-11**. Long dispela 4-pela ves Jisas i pasim dispela tupela samting wantaim.

⁸⁻⁹ Na wantu Jisas i save long dispela tingting ol i mekim long bel bilong ol na Jisas i tokim ol olsem, “Long wanem as yupela kisim kain tingting olsem? Mi bin tokim dispela man lek bilong em i dai pinis olsem, ‘Mi tekewe sin bilong yu.’ Na Mi ken i tokim em tu olsem, ‘Yu kirap na kisim bet mat bilong yu na yu wokabaut i go.’ Na bilong dispela tupela tok wanem tok i no gat strong? ¹⁰⁻¹¹ Tasol, yupela mas klia olsem, Pikinini Bilong Man i gat namba long dispela graun bilong tekewe sin.” Olsem na, Jisas i tokim dispela man lek bilong em i dai pinis olsem, “Mi tokim yu nau, yu kirap na kisim bet mat bilong yu na yu wokabaut i go long haus bilong yu.” Mak 2:8-11.

Em olsem na, taim Jisas i stretim lek bilong lek nogut man, orait Em i putim ples klia olsem, Em i gat namba bilong rausim na fogivim sin.

Pasin bilong Jisas i sailensim ol tisa bilong lo. Long wanem, ol i klia olsem, taim Jisas i stretim lek bilong lek nogut man, orait Jisas i rausim na fogivim sin bilong em. Ol tisa bilong lo ol i lukim na ol i witnisim samting Jisas i wokim, tasol ol i pasim tingting na bel na ol i no laik bilipim na trastim Jisas.

Tasol ol narapela manmeri i stap na i lukim na witnisim. Ol i tanim het na ol i litimapim nem bilong God. Lukim **Mak 2:12**.

¹² Orait, long ai bilong olgeta manmeri em i kirap na em i kisim bet mat bilong em na em i wokabaut i go. Na dispela samting i tanim het bilong olgeta manmeri na ol i litimapim nem bilong God. Na ol i tok olsem, “Bipo, yumi no bin lukim dispela kain samting, nogat tru.” Mak 2:12.

Pikinini Bilong Man Em i rait man stret.

Ol samting bilong rausim na fogivim sin i stap long han bilong Jisas tasol. Em olsem na, maski yumi givim baksait long Jisas na yumi bihainim tok bilong ol man bilong dispela graun. Ol samting bilong rausim na fogivim sin em i no stap long han bilong mi, na em i no stap long han bilong yu, na em i no stap long han bilong ol bikman bilong ol kainkain misin i kam i stap long PNG maski ol i kam paslain o ol i kam bihain. Nogat. Ol samting bilong rausim na fogivim sin em i stap long han bilong Jisas tasol.

Jisas Em i Pikinini Bilong Man, na Em i gat pawa na Em i gat namba bilong rausim na fogivim sin. Olsem na Em i rait man stret bilong tokaut long olgeta samting bilong rausim na fogivim sin. Long dispela as yumi mas harim tok bilong Jisas, na yumi trastim feifful baim bek wok bilong Em na yumi pas long Em na bihainim Em. Yumi trastim God long *kisim bek* yumi long feifful *baim bek* wok bilong Pikinini Bilong Man long diwai kros tasol.

Pikinini Bilong Man i kam bilong mekim wanem?

Yu gat wanem tingting – Jisas i kam bilong mekim wanem?

- Sampela manmeri i tok olsem, Jisas i kam tasol bilong soim yumi stretpela pasin na hau yumi ken i mekim stretpela pasin long wokabaut na sindaun bilong yumi.
- Na sampela manmeri tingim olsem, Jisas i soim yumi ol gutpela pasin yumi ken i mekim bai God i amamas long yumi na kisim bek yumi.
- Sampela manmeri i pilim olsem, Jisas i kam bilong autim tok bilong God tasol, Em i wanpela prisa man tasol.
- Na sampela manmeri i bilip olsem, Jisas i kam tasol bilong stretim sik bilong ol manmeri na bilong soim lavim bilong Em long ol manmeri.

Jisas yet i tok wanem?

Orait, tasol yumi skelim toktok bilong Jisas yet – *Jisas* i tok wanem long as na minim bilong kam bilong Em.

Planti taim Jisas i tokim ol disaipel olsem, “Bai Mi safa na dai.” Long **Mak 10:32-33 na 45** Jisas i putim as bilong safa na dai bilong Em long ples klia.

....Na Jisas i tok olsem, “Yumi bai go antap long Jerusalem, na ol bai putim Pikinini Bilong Man i go long han bilong ol hetpris wantaim ol tisa bilong lo. Ol bai kotim Em na makim Em bilong Em i ken i dai. Ol bai givim Em i go long han bilong ol Jentail, na ol bai tok bilas long Em, na spet long Em, na wipim Em, na kilim Em i dai. Na long 3-pela de bihain Em bai kirap bek gen.”

.... “Pikinini Bilong Man Em i no kam bilong mekim ol manmeri i stap wokboi bilong Em. Nogat. Em i kam bilong mekim wok bilong helpim ol na bilong givim laip bilong Em yet bilong baim bek ol dispela planti manmeri.”

Pikinini Bilong Man i kam bilong i dai. Na as bilong dai bilong Pikinini bilong Man, as bilong dai bilong Jisas i olsem, Jisas i lusim laip bilong Em bilong *baim bek* laip bilong ol *planti manmeri*.

Na Jisas i no tok “kisim bek”. Nogat. Em i tok “baim bek”. Laip bilong Jisas yet i olsem pe bilong *baim freedom* bilong ol planti manmeri bai ol i stap fri long pe bilong sin.

Tok bilong God i toksave long pe bilong ol rong bilong yumi.

God i toksave olsem, pe bilong sin em i dai. Na yumi no inap tru long mekim na wokim ol sampela samting bilong rausim yumi yet long pe bilong sin. Nogat. Yumi mekim sin pinis. Na Bikpela Mejistret i toksave pinis. Lukim **Rom 1:28-32 na Rom 6:23**.

Sampela manmeri i tingim olsem, “*Bihain* God bai skelim pasin bilong yumi na wokim disisen bilong Em.” Tasol nogat. God i skelim pasin bilong yumi pinis na Em i toksave pinis olsem, “Pe bilong sin em i dai.” Em olsem na, yumi save pinis long disisen bilong God long sin bilong yumi – pe bilong sin bilong yumi em i dai.

Tok *dai* em i narapela rot bilong tokaut long yumi lus long God. Yumi sin manmeri pinis, olsem na, yumi lus pinis long God, na *bihain*, taim yumi lusim dispela graun, orait yumi bai lus long God oltaim oltaim long kalabus hel.

Pe bilong sin i holim yumi pinis, na long dispela as yu no fit long baim bek mi, na mi no fit long baim bek yu. Yu no fit long baim bek yu yet, na mi no fit long baim bek mi yet. Long wanem, yumi wantaim yumi lus long God, na *bihain*, yumi wantaim yumi lus long God oltaim long kalabus hel.

Husat i ken i baim bek yumi long kalabus bilong i dai?

Pikinini Bilong Man tasol i ken i baim bek yumi long kalabus bilong i dai. Long wanem, Pikinini Bilong Man Em i no mekim sin na Em i no lus long God na Em i no i stap long kalabus bilong i dai.

Pikinini Bilong Man bilong visin bilong Daniel Em i lusim laip bilong Em yet bilong baim bek laip bilong ol planti manmeri. Dai bilong Jisas Em i pe bilong rausim sinmanmeri long kalabus bilong i dai. Pe bilong sin em i dai, na Jisas Em i dai bilong baimaut pe bilong sin bilong sinmanmeri, bai ol sinmanmeri i bilipim na trastim feitchful baim bek wok bilong Jisas long diwai kros ol i stap fri long kalabus bilong i dai na ol i no ken i lus long God.

Mobeta yumi i stap aninit long Jisas.

Sapos nau em i fes taim yu bin skelim ol dispela samting na yu klia olsem, Jisas i kam long dispela graun bilong lusim laip bilong Em bilong baim bek laip bilong sinmanmeri, na yu klia olsem yu wanpela sin manmeri, orait mobeta nau yu tanim bel na yu putim yu yet aninit long Jisas. Mobeta yu putim yu yet long han bilong Jisas, na yu bilipim na trastim Em long baim bek laip bilong yu.

Ol sampela manmeri ol i harim lotu tasol na ol i no bilipim na trastim feitchful wok bilong Jisas i baim bek ol. Sapos yu stap olsem, orait ating nau em i gutpela taim bilong yu senisim tingting bilong yu, senisim bilipim na trastim bilong yu, na yu tanim i kam na yu bilipim na trastim dai bilong Jisas i baim bek yu long kalabus bilong sin na dai.

Planti taim tumas yumi save trastim save bilong yumi yet long ol samting bilong kingdom bilong God. Nau yumi mas senisim tingting bilong yumi na yumi putim bilipim na trastim bilong yumi long feitchful baim bek wok bilong Jisas long diwai kros. Trastim God long kisim bek yu long feitchful baim bek wok bilong Jisas.

Pikinini Bilong Man i kam bai yumi no ken i lus long God.

Long dispela graun i gat planti manmeri i stap na ol i tingim olsem ol i gutpela manmeri. Em olsem na ol i no tingim baim bek wok bilong Jisas tumas. Long tingting bilong ol, ol i no *nidim* Jisas i kam baim bek ol long sin na feil bilong ol. Ol i tingim olsem ol i gutpela manmeri na ol i no lus long God. Ol i tingim olsem ol i gutpela manmeri na bihain ol i no inap lus long God oltaim oltaim long kalabus hel.

Yumi mas lavim God.

Long **Mak 12:28-31** Jisas i makim stret *as* bilong sin bilong yumi olgeta manmeri bilong dispela graun. Harim tok bilong Jisas long dispela hap.

²⁸ Na wanpela tisa bilong lo em i kam na em i harim ol Sadyusi i diskasim bekim bilong Jisas. Na dispela tisa bilong lo em i klia olsem Jisas i bin bekim ol gutpela tru, na Em i askim Jisas olsem, "Bilong olgeta lo bilong God wanem lo i namba wan stret?" ²⁹ Na Jisas i bekim em olsem, "Namba wan lo stret em i olsem, 'Yupela ol lain Israel yupela harim. Bikpela, God bilong yumi, Em wanpela tasol Em i Bikpela. ³⁰ Na yu mas lavim Bikpela, God bilong yu. Yu mas lavim Em long bel bilong yu olgeta, na long laip bilong yu olgeta, na long tingting bilong yu olgeta, na long strong bilong yu olgeta.' (Lo 6:4-5) ³¹ Na namba 2 lo em i olsem, 'Yu mas lavim ol narapela manmeri olsem yu lavim yu yet.' (Wok Pris 19:18) Na narapela lo i no winim dispela tupela lo." Mak 12:28-31.

Pasin bilong lavim God long bel bilong yumi olgeta, na long laip bilong yumi olgeta, na long tingting bilong yumi olgeta, na long strong bilong yumi olgeta, i minim olsem yumi mas lavim God *olgeta* taim. Yumi no ken i lavim Em tasol long Sande o long Sabat. Yumi no ken i lavim Em tasol long taim bilong lotu na long Krismas na long Ista. Nogat. Yumi mas lavim Em long olgeta *sekon* long olgeta *minit* long olgeta *aua* long olgeta *de* long olgeta *wik* long olgeta *mun* long olgeta *yia*.

Yumi mas lavim God long *bel* bilong yumi olgeta....

Tasol planti taim tumas bel bilong yumi i pulap long pasin bilong lavim yumi yet! Yumi save lavim yumi yet tumas na i no gat banis bilong em i stap! Lavim yumi yet i nambawan samting bilong yumi.

Yumi mas lavim God long *laip* bilong yumi olgeta....

Tasol planti taim tumas laip bilong yumi i pas long ol samting bilong yumi. Laip bilong yumi i pas long ol samting bilong femili bilong yumi, na long ol samting bilong klen bilong yumi, na long ol samting bilong graun na pik na gaden na misin bilong yumi, na long ol kainkain samting olsem.

Yumi mas lavim God long *tingting* bilong yumi olgeta....

Tasol planti taim tumas tingting bilong yumi i strong long ol samting bilong yumi yet. Yumi no tingim ol samting bilong God bai yumi ken i save long Em, na yumi no tok tenkyu long Em long ol wok Em i mekim bilong blesim yumi na helpim yumi. Planti taim tumas tingting bilong yumi i pulap long aigris na long kros na long misin samting na long ol samting bilong tumbuna na long ol samting bilong ples.

Yumi mas lavim God long *strong* bilong yumi olgeta....

Tasol planti taim tumas yumi save yusim strong bilong yumi bilong kirapim na strongim na bihainim ol samting bilong yumi yet. Yumi no yusim strong bilong yumi bilong skelim gut olgeta tok bilong God bai yumi ken i lainim ol sampela samting moa long God na yumi ken i lavim God moa na strong long bihainim Em.

Tingim....

- Taim yumi sindaun pilai kads, orait yumi lavim God long olgeta bel bilong yumi na long olgeta laip bilong yumi na long olgeta tingting bilong yumi na long olgeta strong bilong yumi, a?
- Taim yumi kros pait, orait yumi lavim God long olgeta bel bilong yumi na long olgeta laip bilong yumi na long olgeta tingting bilong yumi na long olgeta strong bilong yumi, a?
- Taim yumi pulim nus, orait yumi lavim God long olgeta bel bilong yumi na long olgeta laip bilong yumi na long olgeta tingting bilong yumi na long olgeta strong bilong yumi, a?
- Taim yumi smok spak brus na dring bia, orait yumi lavim God long olgeta bel bilong yumi na long olgeta laip bilong yumi na long olgeta tingting bilong yumi na long olgeta strong bilong yumi, a?
- Taim yu paitim meri bilong yu, yu lavim God long olgeta bel bilong yu na long olgeta laip bilong yu na long olgeta tingting bilong yu na long olgeta strong bilong yu, a?

Tru tumas yumi nidim Jisas long baim bek yumi.

Yumi feil pinis long nambawan samting bilong God - yumi no lavim God long olgeta bel bilong yumi na long olgeta laip bilong yumi na long olgeta tingting bilong yumi na long olgeta strong bilong yumi. Ating lavim bilong yumi long God em i liklik liklik tumas olgeta.

Dispela graun em bilong God na yumi i stap long dispela graun bilong lavim Em. Na sapos yumi no lavim Em olsem Em i tok, orait i gat pe i stap bilong dispela sin na feil bilong yumi. Pe bilong sin em i dai. Na dai i olsem, yumi lus long God na bihain yumi bai lus long God oltaim oltaim long kalabus hel.

Ating i no gat kwesten mak i stap – tru tumas yumi nidim Jisas i baim bek yumi long sin na feil bilong yumi. Yumi nidim Jisas long baim fridom bilong yumi long kalabus bilong i dai.

Gutnius bilong Jisas Kraus, Pikinini Bilong Man.

Tenkyu tru long God! Long wanem, gutnius i stap. Na gutnius i olsem, Pikinini Bilong Man Em i kam long dispela graun bilong lusim laip bilong Em bilong baim bek laip bilong yumi manmeri i lus long God long sin na feil bilong yumi. Yumi no lavim God olsem God i tok, olsem na, yumi lus long God. Tasol Pikinini Bilong Man Em i kam bilong baim bek yumi, bai yumi no ken i lus long God.

Em olsem na, lusim rot bilong yu, na yu kam i stap aninit long Jisas na trastim God long kisim bek yu long feifitful baim bek wok bilong Jisas long diwai kros.

Pikinini Bilong Man Em i dai.

Jisas Em i Pikinini Bilong Man. Em i King bilong kingdom bilong God. Ol mirakel Jisas i bin wokim, na ol pawa bilong Jisas bilong bosim na kontrolim olgeta samting bilong dispela graun, ol dispela samting i stap evidens na i soim olsem, Jisas i gat namba bilong Pikinini bilong Man bilong visin bilong Daniel.

Ol manmeri Israel ol i tingim olsem Pikinini Bilong Man bai kam na Em bai rausim ol birua bilong ol na mekim Israel i kamap nambawan na i winim olgeta kantri nabaut. Em olsem na ol i tingim olsem Pikinini Bilong Man bai i stap King bilong ol long hia long dispela graun.

Tasol Jisas yet i tok klia olsem, “Mi kam bilong lusim laip bilong Mi bilong baim bek laip bilong planti manmeri. (Lukim **Mak 10:45**.) Planti taim Jisas i skulim ol disaipel bilong Em olsem, “Mi kam bilong i dai.”

Ples Getsemani.

Jisas Em i kam bilong lusim laip bilong Em bilong baim laip bilong ol planti manmeri, na taim dispela samting i kamap klostu pinis, orait Jisas i pilim bikpela hevi nogut tru bilong dispela samting.

³² Ol i go long wanpela hap nem bilong em Getsemani. Na Jisas i tokim ol disaipel bilong Em olsem, “Yupela sindaun hia, Mi laik i go na mekim prea.” ³³ Em i kisim Pita na Jems na Jon i go wantaim Em, na Em i stat nau na pilim bikpela hevi stret long bel bilong Em. ³⁴ Na Jisas i tok, “Bikpela hevi tru i kamap long bel bilong Mi na klostu dispela hevi i pinisim laip bilong Mi. Yupela stap hia na was.” ³⁵ Na Jisas i go liklik moa, na Em i pundaun long graun na Em i prea olsem, “Sapos i gat wei bilong Mi ken i abrusim dispela taim, orait Mi laik abrusim.” ³⁶ Na Em i prea olsem, “Aba, Papa, wanem samting Yu laik mekim Yu inap mekim. Plis rausim dispela kap long Mi. Tasol, Mi no laik Yu bihainim laik bilong Mi. Nogat. Mi laik Yu bihainim laik bilong Yu.” **Mak 14:32-36.**

Jisas Em i save olsem, i no gat narapela rot bilong sin manmeri i ken i pas long God. Long rot bilong Jisas i kapsaitim na lusim laip bilong Em, em tasol em i rot bilong Jisas i baim laip bilong sin manmeri na God i kisim bek ol na ol i pas long Em.

Taim Jisas i tok, “Plis rausim dispela kap long Mi,” orait Em i kisim wanpela tok bilong Olpela Testamen na Em i tok. Long Olpela Testamen God i *tok piksa* na Em i tok long wanpela kap i pulap olgeta long bel hat bilong Em, na Em bai kapsaitim dispela bel hat long ol sin manmeri na ol bai dringim. God i mekim olsem bilong mekim save long sin bilong ol. (Yu ken i lukim **Aisaia 51:17-22**.)

Na taim Jisas i tok long kap, orait Em i tok long dispela kap bilong bel hat bilong God. God bai kapsaitim bel hat bilong Em long Jisas na Jisas bai kisim na pinisim, na long dispela rot ol planti sin manmeri ol i no inap kisim bel hat bilong God long sin bilong ol.

Na taim Jisas i stap long diwai kros na Em i tok, “Em i pinis nau,” (**Jon 19:30**) orait Jisas i tok long ol samting bilong dispela kap. Olgeta bel hat bilong God i kapsait long Jisas na Jisas i kisim na Em i pinisim olgeta.

Em olsem na yumi mas klia olsem, wok bilong Jisas long diwai kros *em tasol* em i rot na i no gat narapela rot na bai God i kisim bek sin manmeri.

Pikinini Bilong Man Em i lus long God.

Long diwai kros God i givim baksait long Jisas. Papa bilong Jisas i lusim Em. Jisas Em i lus long God.

³³ Na long 12 klok tudak i kamap long olgeta hap bilong ol i go inap long 3 klok long apinun. ³⁴ Na long 3 klok Jisas i mekim bikmaus olsem, "Eloi, Eloi, lama sabaktani?" Minim bilong dispela tok i olsem, "God bilong mi, God bilong mi, long wanem as Yu lusim mi? ³⁷ Na Jisas i mekim bikmaus strong moa na Em i dai. Mak 15:33-34 na 37.

Na yumi mas save olsem, pe bilong sin em i dispela kain samting. Ol sin manmeri ol i lus long God, na bihain ol bai lus long God oltaim oltaim long kalabus hel. Long hel yu no inap lukim God i stap pren bilong yu, na yu no inap lukim wanpela blesim bilong Em. Yu bai lus long God na yu bai lus long olgeta samting bilong God oltaim oltaim.

Dai bilong Jisas i trupela stori o nogat?

Yu save, planti manmeri ol i ken i tok olsem, "Dispela stori bilong Jisas i dai long diwai kros em i no trupela histori samting i kamap long dispela graun. Nogat. Dispela stori i giaman stori nating tasol."

Tasol tingim. Long wanem as ol disaipel i lusim laip bilong ol bilong autim dispela tok bilong baim bek wok bilong Jisas long diwai kros? Sapos dispela tok i no tru, orait ol i no inap tromoi laip bilong ol bilong autim tok. Tasol olgeta disaipel ol i tromoi laip bilong ol bilong sapotim na bilong autim tok bilong baim bek wok bilong Jisas long diwai kros.

Na yu skelim narapela samting tu. Ol planti ai witnis i stap na ol planti evidens i stap bilong soim olsem, Jisas i trupela man i kam na Em i lusim laip bilong Em long diwai kros. Na God i lukautim ol toktok bilong ol ai witnis na ol dispela toktok God i putim i stap long Baibel, bai yumi ken i save.

Wanpela rot tasol.

Yumi mas save olsem, Pikinini Bilong Man tasol i ken i baim bek yumi long kalabus bilong i dai. Dai bilong Pikinini Bilong Man em i pe bilong rausim sinmanmeri long kalabus bilong i dai. Pe bilong sin em i dai, na Jisas Em i dai bilong baimaut pe bilong sin bilong sinmanmeri, bai ol i stap fri long kalabus bilong i dai na ol i no ken i lus long God oltaim oltaim long kalabus hel.

Em olsem na, putim bilipim na trastim bilong yu tasol long feifful baim bek wok bilong Jisas long diwai kros. Yu no ken i bilipim na trastim ol narapela samting olsem lotu pasin bilong yu o baptais bilong yu o Sande na Sabat pasin o ol sampela gutpela pasin bilong yu. Nogat. Yu pas olgeta long Jisas tasol, na bihainim Jisas tasol, na yu bilipim na trastim God tasol long kisim bek yu long feifful baim bek wok bilong Jisas long diwai kros.

Pikinini Bilong Man Em i kirap bek.

Nau em i Ista Sande, olsem na mi laik stori liklik long kirap bek bilong Jisas. Yu save, Ista em i taim bilong tingim dai na kirap bek bilong Jisas.

Kirap bek bilong Jisas i senisim ol disaipel.

Pastaim ol disaipel bilong Jisas ol i no tingim olsem Jisas bai dai na kirap bek olsem Jisas i tokim ol. Nogat. Taim Jisas i tokim ol long dai na kirap bek bilong Em, orait ol disaipel i krosim Jisas tasol. (Lukim **Mak 8:31-33.**)

Na taim Jisas i kirap pinis, orait ol disaipel i stap we? Olsem wanem ol i no i stap long ples matmat na wetim kirap bek bilong Jisas? Planti taim Jisas i bin tokim ol long kirap bek bilong Em, olsem na, olsem wanem ol i no stap na wetim kirap bek bilong Em? Yu save, ol i no tingim olsem Jisas bai kirap bek gen na i stap laip, olsem na, ol i wokabaut i go bek gen long ples bilong ol. (Lukim **Mak 16:17.**)

Em olsem tasol taim yumi skelim ol tok i stap long buk Aposel, orait yumi ken i save olsem ol disaipel i senis olgeta. Pastaim ol i no tingim olsem Jisas bai kirap bek na i stap laip. Na taim ol sikuriti i kam arestim Jisas, orait ol disaipel i pret tumas na ol i ranawe na hait nabaut. Tasol, long buk Aposel, yumi ken i save olsem ol disaipel i kisim bikpela strong na ol i no pret moa, na maski ol manmeri i paitim ol, ol i autim tok i go yet bilong witnisim olgeta samting bilong Jisas. (Lukim **Aposel 4:19-20.**)

Wanem samting i senisim ol? Ol i lukim Jisas i kirap bek na i stap laip na dispela i senisim laip bilong ol. Tru, Holi Spirit i givim strong long ol. Tasol, wantaim wok bilong Holi Spirit, olgeta disaipel ol i kisim save tru olsem, Jisas i kirap bek long dai olsem Em i tokim ol. Taim ol i lukim Jisas i stap laip, orait olgeta tubel bilong ol i lus na ol i bilipim na trastim Jisas trutru. Long dispela as ol i sanap strong nau na ol i no pret moa na ol i no ranawe moa. Ol i witnisim Jisas long ai bilong ol planti manmeri na dispela pasin bilong ol i soim yumi olsem, bilip bilong ol i stap olgeta long Jisas. Na yumi mas save olsem, bihain, olgeta disaipel i lusim laip bilong ol bilong witnisim na bilong difenim Jisas na kirap bek bilong Em.

Kirap bek bilong Jisas em i trupela histori bilong dispela graun.

Tru tumas, Jisas Em i kirap bek long dai. Dispela em i trupela histori bilong dispela graun. Na i gat planti witnis bilong sapotim kirap bek bilong Jisas. Lukim tok bilong aposel Pol long **1 Korin 15:3-8.**

Krais Em i dai long sin bilong yumi olsem Tok bilong God i tok, ⁴ na ol i planim Em na long 3-pela de Em i kirap gen olsem Tok bilong God i tok. ⁵ Na Em i kamap long ai bilong Sifas na bihain Em i kamap long ai bilong olgeta disaipel na ol i lukim Em. ⁶ Na bihain Em i kamap long ai bilong ol planti brata na sista, namba bilong ol i winim 500, na wantaim ol i lukim Em. Planti bilong ol i stap yet na wanwan tasol i dai pinis. ⁷ Na Em i kamap long ai bilong Jems, na Em i kamap long ai bilong olgeta aposel na ol i lukim. ⁸ Na las Em i kamap long ai bilong mi na mi lukim.

Tingim. Ol 500 manmeri ol i bung na *olgeta wantaim* ol i lukim Jisas i kirap bek na i stap laip. Kirap bek bilong Jisas em i narapela kain samting, tasol em i trupela samting.

Yumi i bilipim na trastim dai na kirap bek bilong Jisas, orait yumi bilipim na trastim samting i trupela histori na i gat ol planti witnis i stap. Na planti bilong ol witnis ol i lusim laip bilong ol bilong witnisim na sapotim na difenim Jisas i dai na Em i kirap bek na i stap laip.

Ating yumi manmeri bilong dispela graun yumi no yusim het bilong yumi tumas. Planti taim yumi bilipim na trastim ol stori bilong ol sampela samting na i no gat ol planti ai witnis i stap bilong witnisim dispela samting i tru o nogat, tasol yumi bilipim na trastim ol dispela stori. Na stori bilong Jisas i kam i dai na i kirap bek, i gat ol planti witnis i stap, tasol yumi no bilipim na trastim tumas na yumi tubel. Em olsem wanem?

Harim. Stori bilong Jisas i kam i dai na i kirap bek i gat planti ai witnis i stap. Olsem na, i no gat as long yumi tok, "Ol samting bilong Jisas i no tru." Na i no gat as bilong yumi givim baksait long ol tok bilong Jisas.

Kirap bek bilong Jisas i soim yumi olsem, tok bilong Jisas i tru.

Na kirap bek bilong Jisas i ken i strongim yumi long bilipim na trastim olgeta tok bilong Jisas. Long wanem? Jisas Em i kirap bek olsem Em yet i *tok*. Jisas i bin *tokaut* long kirap bek bilong Em na Em i kirap bek olsem Em i *tok*, na long dispela as yumi ken i bilipim na trastim tok bilong Jisas. Jisas i soim yumi olsem, tok bilong Em i gat kaikai na yumi ken i bilipim na trastim tok bilong Jisas.

Na kirap bek bilong Jisas i ken i strongim yumi long bilipim na trastim *nupela laip* em i trupela samting. Jisas i kirap bek na kisim *nupela laip* bilong soim yumi olsem nupela laip em i trupela samting. Jisas i kisim *nupela laip* na Em i go bek long heven bilong soim yumi olsem nupela laip na heven i trupela samting.

Em olsem na taim Jisas i promisim nupela laip na heven i kamap long faithful baim bek wok bilong Em long diwai kros, orait yumi ken i bilipim na trastim dispela tok bilong Jisas. Ol dispela samting i trupela samting na yumi ken i kisim nupela laip na heven long faithful wok bilong Jisas olsem Jisas i tok na olsem Jisas i mekim.

Kirap bek bilong Jisas i soim yumi olsem, Jisas Em i Jas bilong manmeri i no laik bilipim na trastim Em.

Na kirap bek bilong Jisas i soim yumi olsem, i gat taim i stap na Jisas bai kotim na mekim save long ol manmeri i *no laik* bilipim na trastim na bihainim Em. Long **Aposel 17:30-31** aposel Pol i tok olsem, God i kirapim Jisas long matmat bilong soim olgeta manmeri dispela i tru tumas.

³⁰ Pastaim God i larim ol manmeri i no gat save na i stap nating. Tasol nau, Em i tok strong long olgeta man long olgeta hap bilong dispela graun olsem, 'Yupela i mas tanim bel.' ³¹ Long wanem, Em i bin makim wanpela de we Em bai kotim olgeta manmeri. Em bai mekim olsem long stretpela pasin bilong Em. Na Em i makim wanpela man na Em bai i stap jas bilong dispela kot. Na taim God i kirapim dispela man long matmat Em i soim olgeta manmeri dispela i tru tumas."

Bai yu mekim wanem?

Tru tumas, Jisas i kirap bek long dai. Dispela i trupela histori. Ai witnis i bin witnisim. Kirap bek bilong Jisas i soim olsem, God i stap, na nupela laip i trupela samting na i kamap long faithful baim bek wok bilong Jisas, na heven i trupela samting, na kot bilong bihain em i trupela samting.

Em olsem na, bai yu mekim wanem? Bai yu pasim tingting bilong yu na i stap nating, a? Mobeta yu tanim bel bilong yu na yu pas long Jisas na yu trastim God long kisim bek yu long faithful baim bek wok bilong Jisas long diwai kros.

Pasin bilong bihainim Pikinini Bilong Man.

Pikinini Bilong Man Em i wanem kain man? Jisas Em i wanem kain man? Yumi ken i save olsem, pasin bilong Jisas, pasin bilong Pikinini Bilong Man, Em i no olsem pasin bilong yumi na Em i no olsem pasin bilong ol manmeri bilong dispela graun. Jisas Em i man olsem yumi i man, tasol pasin bilong Em i no olsem pasin bilong yumi ol manmeri. Nogat. Pasin bilong Jisas Em i oposit long pasin yumi.

Oposit pasin.

Na yu save long dispela tok “oposit”. Blek em i oposit long wait. Wet em i oposit long drai. Longpela em i oposit long sotpela. Antap em i oposit long daunbilo. Pasin bilong Jisas Em i oposit long pasin bilong yu na mi. Pasin bilong Jisas Em i narapela kain pasin na i no olsem pasin bilong ol manmeri bilong dispela graun.

Yumi skelim toktok i stap long **Mak 10:35-45**. Pasin bilong Jems na Jon na pasin bilong ol narapela disaipel i soim pasin bilong yumi manmeri bilong dispela graun. Tasol pasin bilong Jisas em i oposit long pasin bilong Jems na Jon na ol narapela disaipel. Skelim toktok na tingim.

³⁵ Jems na Jon, tupela pikinini bilong Sebedi, tupela i kam klostu long Jisas na tokim Em olsem, “Tisa, mitupela laik askim Yu long wanpela samting, na mitupela laikim Yu mas mekim dispela samting bilong mitupela.”

³⁶ Na Jisas i tok, “Yutupela i laikim Mi mekim wanem samting bilong yutupela?”

³⁷ Na tupela i bekim olsem, “Taim Yu kamap bikpela king pinis, orait larim wanpela bilong mitupela i sindaun long han sut bilong Yu na narapela i sindaun long han kais.”

³⁸ Na Jisas i tokim tupela olsem, “Yutupela no save long wanem samting yutupela i askim Mi. Yutupela inap dring long dispela kap Mi bai dring long em, a? Na yutupela inap kisim dispela baptais Mi bai kisim, a?”

³⁹ Na tupela i bekim olsem, “Mitupela inap.”

Na Jisas i tokim tupela olsem, “Yes, yutupela bai dring long dispela kap Mi bai dring long em, na yutupela bai kisim dispela baptais Mi bai kisim. ⁴⁰ Tasol, dispela samting bilong sindaun long han sut na han kais wantaim Mi, dispela i no samting Mi ken i makim na givim yutupela. Nogat. God i bin redim dispela samting bilong manmeri Em i bin makim bilong kisim.”

⁴¹ Taim narapela 10-pela disaipel i harim dispela tok, orait ol i bel nogut long Jems na Jon.

⁴² Na Jisas i singautim olgeta i kam klostu na Em i tokim ol olsem, “Yupela save pinis, ol lida bilong ol lain Jentail ol i bikhet na bosim ol manmeri, na ol bikman bilong ol i save bosim ol strong. ⁴³ Tasol yupela no ken i mekim olsem. Nogat. Sapos wanpela bilong yupela i laik kamap bikman, orait em i mas mekim wok olsem em i wanpela wokboi bilong yupela. ⁴⁴ Na sapos wanpela bilong yupela i laik kamap nambawan, orait em i mas mekim wok olsem em i wokboi nating bilong yupela olgeta. ⁴⁵ Pikinini Bilong Man Em i no kam bilong mekim ol manmeri i stap wokboi bilong Em. Nogat. Em i kam bilong mekim wok bilong helpim ol na bilong givim laip bilong Em yet bilong baim bek ol dispela planti manmeri.”

Pasin bilong ol manmeri bilong dispela graun.

Taim Jems na Jon i askim Jisas long sindaun long han sut na han kais long Jisas insait long kingdom bilong Em, orait dispela askim i putim tupela long ples klia. Em olsem na i klia olsem tupela i laik kamap bikpela na

tupela i laik kisim biknem na tupela i laik kisim posisen na tupela i laik winim ol narapela disaipel. Tupela i laik i stap paslain long ol narapela disaipel na paslain long olgeta manmeri bilong kingdom bilong God.

Na ol narapela disaipel ol i kros long Jems na Jon. Long wanem, ol yet ol i laik i kamap bikpela na i kisim biknem na i holim posisen na i winim ol narapela manmeri na i stap paslain. Yu save, dispela kain pasin em i pasin bilong yumi manmeri bilong dispela graun.

Na Jisas i putim pasin bilong ol lidaman bilong dispela graun long ples klia. Jisas i tok olsem, ol lidaman bilong dispela graun ol i bikhet na bosim ol manmeri, na ol i bosim ol strong tumas. Em olsem na Jems na Jon wantaim olgeta disaipel ol i laik kamap lidaman long kingdom bilong Jisas na ol i laik bosim ol manmeri olsem. Ol disaipel i stap olsem ol manmeri bilong dispela graun na ol i laik bihainim wankain pasin bilong bosim na winim ol narapela manmeri.

Pasin bilong Jisas em i oposit long pasin bilong ol manmeri.

Na Jisas i tokaut long narapela kain pasin. Em i tokaut long pasin bilong Em yet. Na dispela pasin bilong Jisas em i oposit long pasin bilong ol disaipel na long olgeta manmeri bilong dispela graun. Jisas i tok, *“Pikinini Bilong Man Em i no kam bilong mekim ol manmeri i stap wokboi bilong Em. Nogat. Em i kam bilong mekim wok bilong helpim ol na bilong givim laip bilong Em yet bilong baim bek ol dispela planti manmeri.”*

Jisas Em i no tingim Em yet, na Em i no tingim gutpela nem bilong Em yet, na Em no tingim posisen bilong Em yet, na Em i no tingim namba bilong Em yet. Nogat. Em i tingim ol planti manmeri na Em i daunim Em yet na Em i lusim laip bilong Em bilong baim bek laip bilong ol. Yu save, pasin bilong Jisas Em i oposit long pasin bilong yumi manmeri bilong dispela graun.

Oposit pasin bilong Jisas em i pasin bilong kingdom bilong God.

Em olsem na, yumi i tanim bel na i kam long Jisas na yumi bilipim na trastim God long kisim bek yumi long feitful baim bek wok bilong Jisas long diwai kros, orait yumi mas save olsem, yumi kam nau long nupela pasin long laip bilong yumi. Yumi i laik bihainim Jisas, orait yumi kam long pasin i oposit long pasin bilong ol manmeri bilong dispela graun.

Lukim na skelim **Efesus 4:17-32**.

Yumi no ken i paul.

Harim. Yumi i bilipim na trastim na bihainim Jisas, orait yumi *no* wok long mekim ol oposit pasin bai God i laikim pasin bilong yumi na kisim bek yumi. Nogat tru! God i kisim bek yumi pinis long feitful baim bek wok bilong Jisas, na long dispela as yumi laik bihainim Jisas na yumi laik bihainim oposit pasin bilong Jisas. Em olsem na, yumi laik bihainim ol oposit pasin bilong Jisas bilong rispektim Jisas. Yumi laik bihainim ol oposit pasin bilong Jisas bilong soim tenkyu bilong yumi long feitful baim bek wok bilong Jisas. Yumi laik bihainim ol oposit pasin bilong Jisas bikos God i kisim bek yumi pinis long feitful wok bilong Jisas na kisim yumi i kam insait pinis long femili bilong Em.

Amamas long bihainim oposit pasin bilong Jisas.

Sapos yu amamas long feitful baim wok bilong Jisas long diwai kros na yu amamas long God i kisim bek yu long feitful baim bek wok bilong Jisas long diwai kros, orait yu mas amamas tu long bihainim ol oposit pasin bilong Jisas long wokabaut na long sindaun bilong yu. Long wanem, taim yu tanim bel na yu kam long Jisas na yu bilipim na trastim feitful baim bek wok bilong Em long diwai kros, orait dispela i minim olsem yu kam tu long ol oposit pasin bilong Jisas long olgeta samting long laip bilong yu.

Lida long sios bilong Pikinini Bilong Man.

Las wik long Sande Baibel Toktok (*Pasin bilong bihainim Pikinini Bilong Man*) yumi kisim save olsem, pasin bilong Jisas em i *oposit* long pasin bilong ol manmeri bilong dispela graun.

Dispela tok *oposit* em i nupela nek liklik long Tok Pisin bilong yumi. Yumi save olsem, waitpela samting em i narapela kain olgeta long blekpela samting, na samting i drai em i narapela kain olgeta long samting i wet, na samting i longpela em i narapela kain olgeta long samting i sotpela, na antap em i narapela kain olgeta long daunbilo. Em olsem na yumi ken i tok olsem, wait em i *oposit* long blek, na drai em i *oposit* long wet, na longpela em i *oposit* long sotpela, na antap em i *oposit* long daunbilo.

Taim yumi tok, “Pasin bilong Jisas Em i *oposit* long pasin bilong yumi”, orait yumi minim olsem, pasin bilong Jisas Em i narapela kain pasin na i no olsem pasin bilong yumi manmeri bilong dispela graun.

Oposit pasin bilong Jisas.

Tingim. Jisas Em i no tingim Em yet, na Em i no tingim gutpela nem bilong Em yet, na Em no tingim posisen bilong Em yet, na Em i no tingim namba bilong Em yet. Nogat. Em i tingim ol planti manmeri na Em i daunim Em yet na Em i lusim laip bilong Em bilong baim bek laip bilong ol. Yu save, pasin bilong Jisas Em i *oposit* long pasin bilong yumi manmeri bilong dispela graun.

Em olsem na, yumi i tanim bel na i kam long Jisas na yumi bilipim na trastim God long kisim bek yumi long feitful baim bek wok bilong Jisas long diwai kros, orait yumi save olsem, yumi kam nau long nupela pasin long laip bilong yumi. Yumi kam long pasin i *oposit* long pasin bilong ol manmeri bilong dispela graun. Taim yumi tanim bel na yumi kam long Jisas na yumi bilipim na trastim feitful baim bek wok bilong Em long diwai kros, orait dispela i minim olsem yumi kam tu long ol *oposit* pasin bilong Jisas long olgeta samting long laip bilong yumi.

Lidaman bilong of femili bilong God.

Long **Mak 10:42-44** Jisas i tokim ol disaipel olsem, “*Yupela save pinis, ol lida bilong ol lain Jentail ol i bikhet na bosim ol manmeri, na ol bikman bilong ol i save bosim ol strong. Tasol yupela no ken i mekim olsem. Nogat. Sapos wanpela bilong yupela i laik kamap bikman, orait em i mas mekim wok olsem em i wanpela wokboi bilong yupela. Na sapos wanpela bilong yupela i laik kamap nambawan, orait em i mas mekim wok olsem em i wokboi nating bilong yupela olgeta.*”

Long dispela toktok Jisas i putim ples klia olsem, man i laik kamap bikman namel long ol lain manmeri bilong God, long sios femili bilong God, orait em i mas bihainim pasin i *oposit* long pasin bilong ol lidaman na ol bikman bilong dispela graun.

Jisas, long maus bilong aposel Pol, Em i mekim wankain toktok long Timoti. Long **1 Timoti 3:1-7** aposel Pol i putim ples klia olsem, man i laik kamap lida bilong sios em mas i stap man i bihainim pasin i *oposit* long pasin bilong ol manmeri bilong dispela graun na i *oposit* long pasin bilong ol lidaman bilong dispela graun. Lukim na skelim **1 Timoti 3:1-7**.

¹ Wanpela tok i stap, na dispela tok yu ken i trastim. Na dispela tok i olsem, sapos wanpela man i laik kamap lida bilong sios, orait em i laikim gutpela wok.

² Orait na, man i ken i kamap lida bilong sios em mas i stap gutpela man na i no gat wanpela rong i stap we ol manmeri i tok baksait long em,

na em i man bilong wanpela meri tasol,

na em i man bilong sindaun isi,

na em i stiaim gut tingting na pasin bilong em yet,

na em i stap stret long olgeta samting,

na em i amamas long mekim gutpela long ol manmeri i no wantok bilong em,

na em i wanpela gutpela tisa,

³ na em i no pas long ol strongpela dring bilong spak,

na em i no man bilong bel hat hariap na solapim narapela manmeri, nogat, em i man bilong bel isi

na mekim gutpela long narapela manmeri,

na em i no tingting long mekim tok pait olgeta taim,

na em i no lavim mani.

⁴ Em i bosim na lukautim femili bilong em gutpela, na pikinini bilong em i harim na bihainim tok

bilong em, na ol i rispektim em. ⁵ Yu save, sapos em i no bosim na lukautim femili bilong em

gutpela, orait hau na bai em i lukautim sios bilong God gutpela?

⁶ Nupela man bilong bilip i no ken i kamap lida bilong sios. Long wanem, nogut em i apim em yet long tingting bilong em yet na em i pundaun na kisim hevi olsem Satan bai kisim.

⁷ Na man i laik kamap lida bilong sios em mas i gat gutpela nem namel long ol manmeri i stap autsait long sios. Long wanem, sapos em i no gat gutpela nem olsem, orait Satan bai yusim dispela samting bilong mekim sem long em.

Sapos wanpela man i laik kamap lida bilong sios, orait em i laikim gutpela wok. Tasol man i ken i kamap lidaman bilong sios, orait em mas i stap man i amamas long bihainim *oposit* pasin olsem Pikinini Bilong Man, Hetman na oana bilong sios, i bihainim. Pasin bilong lidaman bilong sios bilong Jisas em i *oposit* long pasin bilong ol lidaman bilong dispela graun.

Em olsem na yumi i laik i stap lidaman namel long ol manmeri long femili bilong God, orait yumi mas i stap man i wokabout long pasin i *oposit* long pasin bilong ol manmeri bilong dispela graun na i *oposit* long ol lidaman bilong dispela graun. Long dispela rot tasol bai yumi helpim ol manmeri bilong Jisas i bihainim Em.